



16. marts 2017

UPA 2017/64

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

**Paasissutissanik piniarnermut atatillugu inatsisitigut tunngavissaqarnissaq qularnaarumallugu, takuuk ilanngussaq 1 formatimi nassuiarneqareersumi, kingusinnerpaamik UPA2018-mi siunnersuummik saqqummiusseqqullugit, Naalakkersuisut peqquneqarnissaannik Inatsisartut aalajangiiffigisassaattut siunnersuut. Ilanngussaq 1-mi taaneqartut paasissutissat eqqarsaatigalugit Naalakkersuisut peqquneqarput tamanit iserfigineqarsinnaasumik nittartagalioqqullugit paasiuminartunik naatsorsoqqissaakkanik katersanik imalimmik, tassani soqutinittut meeqqat atuarfiat pillugu paasissutissanik naapertuuttunik aallarsinnaalersillugit. Naatsorsoqqissaakkanik katersivik suliarineqassaaq meeqqat atuarfii ataasiakkaat naleqqiunneqarsinnaanngorlugit, imatulli sanallugu inunnut ataasiakkaanut paasissutissat pissarsiariniarneqarsinnaajunnaarlugit.**

(Inatsisartunut ilaasortaq Nivi Olsen, Demokraatit)

### **Tunngavilersuut**

Meeqqat Atuarfiat tamatsinnut pingaaruteqarpoq. Tamatta soqutigisaraarput meeqqat atuarfiata sapinngisamik qaffasissumik pitsaassuseqarnissaa, tunngaviliisarmat meerartatta inuusuttattalu piginnaanngorsarluarnissaannut. Tamatuma kingunerilluarsinnaavaa inuusuttunngornerminni tulluarisaminnik ilinniagaqalersinnaanissaat.

Angajoqqaat, politikerit, tusagassiorfiit, atorfillit allallut soqutigisaraat meeqqat atuarfiisa qanoq ingerlanerannut malinnaassallutik. Ullumikkulli ajoraluartumik kisitsisinik paasissutissanik soqanngilaq, katersanik takussutissiisinnaasunik atuarfiit ataasiakkaat immikkoortuni assigiinngitsuni qanoq ingerlanerannut allanut naleqqiullutik.

Paasissutissanik katersuivimmik pisariaqartitsineq tigussaasunngortinniarlugu assersuusiussaanga nammineq Ilisimatusarfimmi immikkut ilinniagaqarallarninneersumik.

Naatsumik oqaatigalugu specialinni allaaseraakka ilinniarfinni qaffasissusi ikerinnakkut taamaattarnermut pissutaasut kiisalu kulturitsinni pissusissamik eqquisarneq kiisalu suliffimmut tunniusimaneq. Tassungali atatillugu pingaaruteqarpoq qiviassallugu, inuusuttatta meeqqat atuarfiani qanoq ingerlanerat. Taamaattumik pisariaqartissimavara meeqqat atuarfianut tunngatillugu kisitsisitigut paasissutissat assigiinngisut, ajornarluinnangajassimavorli. Inerisaavikumi sulisumiik sulisumut innersuunneqattaarsimavunga naggataatigulli pissarsiaaraakka kitsisitigut paasissutissat assigiinngisut ataqatigiisikkuminaatsut taamaattumillu atorluarsinnaanngisut.

Taamanili eqqarsaatigaara, eqqumiigalugu, kisitsisitigut paasissutissanik katersuiveqanngimmat, soqutiginnittunit imaaliallaannaq alakkarterneqarsinnaasumik.

Tamannalu iluarseriniarpara manna siunnersuutiga aqqutigalugu. Uunga siunnersuummut ilanngussaq 1-mi takuneqarsinnaapput immikkoortut isumaga naapertorlugu tamanut takusassiarineqarsinnaasut. Pingaaruteqarpoq kisitsisit agguarneqartarnissaat meeqqat atuarfiinut ataasiakkaanut, pitsaasunik tunngavissaqarumalluni naleqqersuussiniarnermi.

Uannut pingaaruteqarpoq tikkuassallugu siunertarigakku, naatsorsoqqissaakkanik katersuiviup meeqqat atuarfiannik pitsanngorsaannissaa. Atuartunut ilikkagassat kiisalu ilinniartitsisut sulinerminni atugaat eqqarsaatigalugit. Naatsorsoqqissaakkanut katersivimmi paasissutissat assersuutigalugu tigussaasumik takutissinnaassavaat, atuarfimmi sorlermi ilinniartitsisut takkutinnigitsuukulannginnerusimanersut. Paasissutissaq taanna atuarfimmi tassanerpiaq suut iluatsissimanerinnut misissuinermut aamma atorneqarsinnaavoq taava atuarfiit allat isumassarsitinneqassapput aamma taamaaliornissaminnut.

Siunertarinngilara atuarfiit arlaannaanilluunniit isiginerlutsitsinissara - siunertaraarali nutaamik sakkussamik pilersitsinissaq, paasiuminartumik paasissutissiisinnaasumik, sumi iliuseqassalluni naapertuutissanersoq.

Partiit allat oqaaseqaatissaannut kiisalu Naalakkersuisut akissuteqarnissaannut qilanaarpugut.

### **Aningaasatigut allaffissornikkullu pisortanut kingunerusussat**

Ilanngussaq 1-mi taaneqartut paasissutissat aasalernissaannut inatsitigut tunngavissaqalernissaq pillugu inatsisissatut siunnersuutip suliarinissaanut taggippara ilinniagartuup qaammatini pingasuni suliarisinnaassagai, tassa 125.000 koruunit nalinganut.

Aningaasartuuteqarfiussapput paasissutissanut katersuiviup pilersinnissaa aamma tassunga atasumik nittartakkamik pilersitsinissaq. Paasissutissanut ataatsimoortumik katersuiviliornissap suliarinissaa nittartagaliorlunissarlu suliariumannittussarsiuunneqartariaqarput, qularnaarumallugu suliarineqarnissaa, inuiaqatigiinnut iluaqusiinerpaamik. Naatsorsuutigineqanngilaq ataatsimut aningaasartuutit 250.000 - 300.000 koruuninik akisunerujumaartoq.

Tamatuma saniatigut nittartagaq paasissutissanillu katersuivik aserfallattaalineqartassaaq ingerlaavartumillu nutarterneqartarluni, tamannalu ilinniagartuup ataatsip ukiumut suliarisarsinnaassavaa, naleqassalluni 500.000 koruuninik.

Naggataatigullu qularnanngilaq paasissutissanik aallerneq paasissutissanillu pajuttoorneq kommuninut aningaasartuutitaqassasoq. Tamanna immaqa pisinnaavoq 1. oktoberimi nalunaaruteqartarnerup annertusineratigut takuuk meeqqat atuarfiat pillugu inatsit atuuttoq. Naalakkersuisulli inatsisiliassaata ilusissaa apeqqutaajumaarpoq. Kommunillu nukinnik atuinernissaat imatut malunnartorsuunaviangillat. Paarlattuanilli atuarfiit ataasiakkaat aaqqissuulluakkamik nalunaaruteqartarnissaat pisariaqassaaq atuartut atuanngitsoortarnerat eqqarsaatigalugu.

**Aningaatigut allaffissornikkullu sullivinnut namminersortunut kingunissai.**

Soqanngilaq.

**Aningaatigut allaffissornikkullu innuttaasunut kingunissai**

Aningaatigut kinguneqassanngilaq, innuttaasulli takupallasinnaalissavaat atuarfiit  
ataasiakkaat qanoq ingerlanersut atuarfinnut allanut naleqqiullutik.

## **Ilannguaaq 1 – UPA2017/64**

**Naatsorsoqqissaakkanut katersiviup imarissavai paasissutissat makku Kalaallit Nunaanni meeqqat atuarfiinut tunngasut:**

- Alloriarfiit angusaat
- Naggataarutaasumik soraarummeernermi inernerit
- Atuartut peqanngiffii katillugit
- Ilinniartitsisut peqanngiffii katillugit
- Atuartut amerlassusaat ilinniaqqinniarlutik ingerlaqqissimasut imaluunniit assigusut

Paasissutissat sapinngisamik naleqqersuunneqarsinnaassapput meeqqat atuarfiisa piffissallu akornanni.